

Jugendfestsprüche 2026

Bögen

Turnerweg

Raiffeisenbank • Asilo Italiano

D Gen Beta, ine Wält gebore,
So vill Krise, z vill um d Ohre.
Was macht die Generation? –
Si goht nümm i d Produktion.

Kürzlech uf em Bummel
Fang i en Asie-Hummel.
I schicke si de gly
Per Temu zrugg a Xi.

Bahnhofstrasse

Rudolf-Steiner-Schule

S «eifach» isch am Sunntig zue –
Nid wägem Wirt sinere Rue.
D Lüt würde d Mäss verpasse,
Wenns bim Sufo s Gäld verpasse.

D Kathole lade zum Kafi i,
D Reformer bringe ne verbi.
Mer finde beides glatt,
Seel und Mage würde satt.

Kebab-Haus

S Gäld isch do gsi, offiziell,
Doch leider isch si nid so schnell.
Was bim Kanton no z hole wär,
Merkt eusi Stadt erscht hinderhär.

Bim neue Gricht stoht d Lilo
Und gseht s Gedankesilo.
Si dankt: «Das isch nid schön
und au no rächt obszön».

Aavorstadt

Albani • Südseite

Mer goht das so a d Niere:
Staufe wott fusioniere.
Zum Glück kapier i schnell,
S goht jo nur um d SWL.

D Wält hett grad es blonds Problem,
Das isch mächtig unbequem.
Bi eus für Ärger – s isch kei Witz –
Sorgt s Parkiere bim Tschutti-Fritz.

Migros • Nordseite

Mit Gäld chame viles,
Di einte verspiles,
Di andere wäsches,
Und d Stadtröt vergässes.

Drohne-Chrieg, Polit-Glön,
Terror, Diktatore-Wäse.
Bi eus (s isch jo no schön),
Cha mer nume d Mails nid läse.



Burghaldenstrasse

Restaurant Burghalde • Ziegelrain

Für de neu Schuelstandort
Stoht d Schützi jetz bereit,
D Zone im Wil blibt verschont –
Zur präsidiale Zfrideheit.

De Lehrer seit: «Voll lit»
Und dänkt er seig de Hit.
Druf seit er: «Das isch fly»,
Jetzt isch er wüerkli high.

Ochsen • Parkplatz Seifi

Fahrverbot und Eibahnstross
Euse Frust isch risegross –
Weisch gar nümme, wos dure goht.
Fahrsch en Umwäg und bisch z spot.

Für d Räbe bim Schloss
Gits e Moschti-Boss.
I hoff', bi dem Pur
Wird de Wy nid sur.

Römerweg

Schützenmatte • Adam Touring

Under euse Freischare
Hetts jetz au no Hofnarre.
Me hett si zügig gfunde:
Nämli im Rothus unde.

Tiktok, Netflix, Instagramm:
D Juget hett es strängs Programm.
Statt uf de Schützi z tanze,
Plangg't si deheim de Ranze.

Kirchgasse

Stadtbibliothek

Spiritus Sanctus us de Tasse
Freut di reformierte Masse?
Statt nur mit de Glogge z schalle,
Tüends eim Kaffi ineknalle.

D Bibli vo de Stadt
Finde mer alli glatt.
Nur eine wott si ned,
De Amme (nid de Schmed).

Willener • Vicolo

S Altstädter Lädelistärbe
Tuet allne d Lune verdärbe.
S lokale Gwärb z understütze,
Würd wüerkli allne do nütze!

Euse Märt isch nur es Märtli.
Händ all hütt es eignigs Gärtli?
Oder chaufe si online i?
Das chas jo eigetli nid si?

Rathausgasse

Willener • Asia Take Away

Die beide Güggel im Rot
Realisiere vill zschpot:
Mer sind jetz nümme d Triber,
Regiere tüend eus d Wiber.

Us em Amme e Presidänt?
Findi no patänt.
Us eme Chines e Gardischt?
So ne Mischt.

Hirschen • Beldona

Zum regiere, i gibz zue,
Sind föif Stadtröt noni gnue.
S brucht no eine wo si stützt.
I hoffe nur, dass es nützt.

De Amme knapp verpasst,
Isch aber nid verblasst.
Si blost nid de Blues,
Git Gas im Bundeshus.

Leuengasse

Seite Kronenplatz

Es Inti do, e Foti det,
Demits au sicher jede gseht.
Wie chunsch i Präss und i TV? –
Als im Präsi si Stevau.

Am Ohr hani ne satt,
De Beantwörter vo de Stadt:
Statt Narre und Schwinger
Brüchtis ehnder es paar Springer.

Malagapark

Geburtsbaum

Mit eim Baum pro Johr
Wändsi s Klima rette ...
Drum chönes oni Gfohr
Witer umejette!

Brunnen

Amtshausbrunnen

Grönland chaufe?? 🤪
Mir machen au e Deal
Und nämen Ammerschwil!

Altersheimbrunnen

«So es heisses Fahrgstell!» –
... De Rollator vo de Isabell.

Begegnungsbrunnen

S isch Jugetfescht – juhu!
Parat au d Kadette und d Freischare –
HONOLULU!

Brünggelbrunnen

Wenn d Wält au grad uf Chaos stoht,
Zeigt Länzburg, dass' au fridlech goht.

Mer sind eus einig: S Allerbescht
Isch euses schöne Jugetfescht.

Öb alt, öb jung, öb neu debi –
Es sölle all willkomme si.

Chlausbrunnen

De Chlaus isch entsetzt
D Indianer müend goh!
S Tipi vor sinere Nase
Löhnd s lo stoh.

Ellsworth-Rain-Brünneli

Mit Narre statt Bojare
D Kadette überfahre?

(Thema: Jugendfest)

Kronenplatzbrunnen

Eusi Vielfalt a Vereine
Unändlich – isch z meine.
Chum, wähl dir eine us,
Vom bunte Bluemestruss.

Güggelbrunnen

Schnabel uf, Schnabel zue,
Graben uf, Grabe zue,
Rueh!

Moritzbrunnen

17 Johr mit Härzbluet gschmückt
Und eusi Härze voll beglückt.

(Thema: Das Team verabschiedet sich nach 17 Jahren Schmücken)

Museumsbrunnen

De Zit vorus – Johr i, Johr us:
Fraue-Power – das machts us.

(Thema: Pionierinnen)

Ochsenbrunnen

Mir fired zäme gross und chli,
So söll s z Länzburg immer si.

Römerwegbrunnen

Am Jugetfescht sind all debi –
Genau so söttis immer si!

(Thema: Inklusion)



Schwanenbrunnen

Es brönnt s Schloss
Vo dene uf de Ross.
Eusi Burg am Wasser
Wird nur echli nasser.

Sodbrunnen Ziegelacker

Sobald d Sunne lacht
Und de bis i d Nacht,
Isch es Zit zum Fire,
Für di Grosse und di Chline.

Spittelbrunnen

Hinder schöne Fänschter
Gits öppen au Gspänschter.

(Thema: Jugendfest-Fenster)

Steinbrüchliwegbrunnen

D Hero-Gschicht isch bald verbi –
Wird immer es Stück Länzburg si.

Widmebrunnen

Am Tag e wiss-blaui Pracht,
Und finkle tueni i de Nacht.